

Cart De'en Bzoj San Jodasən'

**Chzoje' beṇə' ca' zjənaque'
lažə' na' Diozən'**

¹Nada' Jodas naca' beṇə' güen žin che Jesocristən', na' naca' beṇə' bišə' Jacobən'. Chzoja' le'e bagwlej Xacho Diozən' par nacle lažə' ne'enə' can' bagwleje' nada', le'e chcuasə' chcue'ej Jesocristən' len de'e malən' can' chone' len nada'.
²Chona' orasyon lao Xacho Diozən' chṇaba' gone' ca gacbelichele can' cheyašə' cheži'ilažə'e le'e na' can' chone' par chzo chbezle binlo len xbab de'en yo'o lo'o yichjla'ažda'olen' na' can' chaquene' chele.

**Beṇə' ca' choso'osed
choso'olo'ine' dižə' güenlažə'**

³Xi'inṇaogua'a, bachonchgua' xbab naquən' gwzoja' le'e to cart gwzejni'ichda' le'e can' babebej Jesocristən' yoguə' chio'o chonlilažə'ačhone' xni'a de'e malən'. Pero na' babenda' yeto rson chele na' ṇa'a chonən byen chzoja' le'e chṇeyoida' le'e sole chech šejle'ele che dižə' li che Diozən'. Diozən' bene' par ničh nyojən par chio'o bagwleje' ničh naccho lažə' ne'enə', na' bito

gwšə'en. ⁴Banitə' balə beṇə' entr le'e, beṇə' ca' chso'on txen len le'e pero caguə do lažə'əga'aque'enə'. Bito choso'ozenague' che Diozən' na' chəsə'əne' de que deczə lsens goncho bitə'ətezə yelə' zto' len cuerp chechon', chedə' nži'ilažə' Diozən' chio'o na' chezi'ixene' checho. Na' leczə chesə'əzoe' Xancho Jesocristən' ca'alə, len tozə le' zaque'e par nabi'e yoguə' beṇə'chən'. Cana'ate byoj Xtizə' Diozən' nan de que beṇə' ca' chso'on ca' yesə'əzi'e castigw che xto'ə'əga'aque'enə'.

⁵Na' la'anə'əczə banezele binlo can' goquən', che'enda' žjəsə'alazažə'əle de que Diozən' bosle' beṇə' Izrael ca' lao na' beṇə' Egipto ca' cana' pero gwdechle bnežjue' castigw che beṇə' ca' cui gwso'onlilažə'ene'. ⁶Na' balə angl ca' bito gwsa'azlažə'e de'en gwlo'o Diozən' lao na'aga'aque' so'one', na' de'e na'anə' gosə'əbejyichje' gan' gwnite'enə'. Na' Diozən' gwlo'e lega'aque' lo'o yech gabil gan' naquə lechgualə žčol, na' zjənga'ane' xte catə'əch əžin ža xen catə' gwnežjue' castigw chega'aque'enə' zejlicane, la' zjənaque' pres che Diozən' zejlicane.

⁷Nach beṇə' ca' gwnitə' syoda Sodomān' na' syoda Gomorran' na' syoda' ca' zjənyechj zjəmbi'i lega'aquən gwso'one' yelə' zto' len cuerp chēga'aque'enə' na' besyə'əyiljtezē' ljuežj beṇə' byoga'aque' par niç gwso'one' yelə' zto' chēga'aque'. Na' ca de'en ben Diozən' bsele'e yi'inə' bzeyən syoda ca' na' cuich no gwnitə' na', chosnisən beṇəçhən' de que yoguə' beṇə' cui choso'ozenag che Diozən' əsa'aque' castigw lao yi' gabilən' zejlicane.

⁸Na' beṇə' ca' choso'osed choso'olo'i le'e dižə' güenlažə'əṇə' chso'one' can' gwso'on beṇə' Sodomā na' beṇə' Gomorra ca'. Chso'one' yelə' zto' che cuerp chēga'aque'enə'. Bito chse'enene' nabia' Diozən' lega'aque'. Choso'ožia choso'onite'e angl ca'. Chəsə'əne' de que besə'əle'idaogüe'ene' de'e nan de lsens par so'one' de'e ca'. ⁹Ca naquə angl əblaona' ben' le Miguel catə'an gocyožē' de'e gwxiye'en por cuerp che de'e Moisezən', bito beyaxjene' tile' de'e gwxiye'en de'en gwnen contr de'e Moisezən', con gože'en: "Xancho Diozən' tile' le." ¹⁰Pero na' beṇə' ca' choso'osed choso'olo'i le'e dižə' güenlažə'əṇə' choso'ožia choso'onite'e bitə'ətezə de'en cui chse'ejni'line'. Gwxaquə'əlebəga'aque' ca bia yixə' chedə' chso'one' porzə de'en na cuerp chēga'aque'enə'. Na' de'en chso'ontezə chso'one' can' nanṇə' yesə'əbiayi'e zejlicane.

¹¹Probchguazə beṇə' ca'. Chso'ontezə chso'one' de'e mal can' ben de'e Cainṇə', na'

chesə'əzelaze'e yesə'əželene' mech əsçha'o can' ben de'e profet Balaanṇə'. Chso'one' contr Diozən' na' yesə'əbiayi'e can' gwžiyai' de'e Coren' ben' ben contr de'e Moisezən' cana'. ¹²Gwxaquə'əlebəga'aque' ca to manch lao lachə' xi'ilažə'əṇə', la' žlac che'ej chaole txen len lega'aque' par cho'ela'ole Xancho'n', chso'elažə'əzeche' chse'ej chsa'oçate'. Con chse'ej chsa'oteze' bi chse'enene'. Gwxaquə'əlebəga'aque' ca bejw biž de'en nžiguə' be', na' ca yag frot de'en cui bi frot chbia catə' chžin tyemp chei, chedə' babgüižən na' banlažə' do loi. Gwxaquə'əlebəga'aque' ca bejw biž na' ca yag frot de'e cui bi frot chbian chedə' bito zjəzaque'e. ¹³Na' gwxaquə'əlebəga'aque' ca nisdəon' de'en chas chatə' na' checho'onən bžin' lao yon' cho'a nisdə'onə'. Can' gwxaquə'əlebəga'aque' chedə' de'en chso'one' na' dižə' de'en chso'echgüe' choso'olo'en yelə' zto' chēga'aque'enə'. Na' leczə gwxaquə'əlebəga'aque' ca to beljw de'en chde šaltezə, chedə' Diozən' babžie' bia' yesyə'əžine' lo'o yech gabil gan' lechgualē naquə žçhol na' gan' yesə'ənite'e zejlicane.

¹⁴Gwzolaon tyemp che de'e Adanṇə' xte tyemp che Enoquən' goc gažə dia che Adanṇə'. Na' Enoquən' be'e dižə' che beṇə' ca' chso'on can' chso'on beṇə' ca' choso'osed choso'olo'i dižə' güenlažə', gwne': "De'e li Xancho Diozən' yide' len angl zan juisy che' ca'. ¹⁵Na' əçhoglaogüe'en che to to

benach šə zjənapə' dolə' o šə cui zjənapə' dolə'. Na' gone' ca sa'acbe'i yoguə' beṇə' ca' cui boso'ozenag che' de que lechgualē de'e mal juisy bagwso'one'. Na' gone' par niḥ žjəsyə'əza'alažə'e yoguə' de'e malən' bagwso'one' de'en cui boso'ozenague' che'. Na' leczə gone' par niḥ žjəsyə'əza'alažə'e yoguə' de'e mal de'en bagosə'əne' contr le'. Na' əgwnežjue' castigw che to toga'aque'." ¹⁶Beṇə' ca' cui choso'ozenag che Diozən' chəsə'əže'ešə'e che', bitobi chesyə'əbeine', con chso'ontezə' can' na la'ažda'omalga'aque'en, chso'on cuinga'aque' xen, na' choso'opeine' beṇə' la' chse'lenene' yoso'onežjo beṇə' ca' lega'aque' mech.

Consejw de'en chnežjue' beṇə' ca' chso'onlilažə' Jesocristən'

¹⁷Pero na' le'e xi'indaogua'a, cheyałə' žjəsə'alažə'əle de'en gwse' apostol che Xancho Jesocristən' le'e antslə. ¹⁸Gosə'əne': "Na'a cuiṇə' yidə Xancho' de'e yoblə nitə' beṇə' so'onzeche' yelə' zto' chega'aque' con can' na la'ažda'omalga'aque'enə', na' so'one' borl che de'en na Diozən'." ¹⁹Beṇə' ca' chso'one' par niḥ gwde gwdele can' chejni'ile xtižə' Diozən'. Con chso'one' can' chene'e la'ažda'omalga'aque'enə' chedə' bito yo'o Spirit che Diozən' lo'o yichjla'ažda'oga'aque'enə'.

²⁰Pero na' le'e xi'indaogua'a, chejle'ele che dižə' li che Diozən' de'en naquə de'e güenchgua. Na' cheyałə' sotezə sole gonle can' nanṇə' par niḥ gaquə gonle can' chazlažə' Diozən'. Na' le'gon orasyon can' əgwzejni'i Spirit che Diozən'

le'e. ²¹Na' le'e so le'e gon par niḥ gacbe'ile de que chaque Diozən' chelen'. Xancho Jesocristən' gone' par niḥ əbanle len le' zejlīcane laogüe de'en cheyašə' cheži'ilažə'e le'e. Leso leyebei de'en gone' ca'.

²²Baļə beṇə' chso'onlilažə' Jesocristən' chsa'acžejlažə'e šə cheyałə' yesə'ənaogüe' dižə' li che Diozən'. Le'gon par niḥ sa'acbe'ine' de que cheyałə' yesə'ənaogüe'en. ²³Na' baļe' ze'e gwzolo chesə'ənaogüe' de'en choso'osed choso'olo'i beṇə' güenlažə' ca'. Le'e yeyašə'e lega'aque' na' le'e co'oga'aque' nez güennə' lgüegwzə. Na' le'e gapə cudad par niḥ cui gonle de'e mal de'en chso'on lega'aque'.

Jodasən' cho'elaogüe'e Diozən'

²⁴Cheyałə' güe'ela'ocho Diozən' la' le'enə' chac chone' ca cui əxorcho goncho de'e malən', na' chac chone' par niḥ bitobi de'e mal da' əchen yichjla'ažda'ochon' catə' əžin žan' le'icho yelə' chey che'eni' che'enə'. Na' cana' lechgualē yebeicho. ²⁵Tozə Diozən' zaque'e par güe'ela'ochone', na' naque' le'ezelaogüe beṇə' sin'. Babebeje' chio'o xni'a de'e malən' ca de'en bsele'e Xancho Jesocristən' gwdixjue' xtolə'əchon'. Ledoye'ela'oche' chedə' naque' le'ezelaogüe beṇə' zaque'e na' beṇə' blaο na' chnabi'e doxenlə. Zocze' dezd catə'ən cuiṇə' xe yežlyon' na' par zejlīcane. Na' naque' Xan yoguə' benach, yoguə' bia chsa'aš na' yoguə' biquə'əchlə de'e zjəde. Ca'ašgaczə gaquə.

De'e na'azən' chzoja' na'a.
Jodas